

# Senta Simon : bärndütschi Sonett

Autor(en): **Schmid, Gotthold Otto**

Objektyp: **Article**

Zeitschrift: **Schwyzerlüt : Zyttschrift für üsi schwyzerische Mundarte**

Band (Jahr): **19 (1957)**

Heft 3

PDF erstellt am: **09.08.2024**

Persistenter Link: <https://doi.org/10.5169/seals-186721>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern. Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden. Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

# SCHWYZERLÜT

---

Zytschrift für üses Schwyzerdütsch

Erschynt 3 bis 5 mal im Jahr i Doppelheft

---

Redaktion: Dr. phil. G. Schmid, Fryburg im Uechtland, Jurastrass 53

Verlag: Schwyzerlüt-Verlag, Fryburg. Druck: Buchdruckerei W. Weiss, Affoltern a. A.

Abonnemänt für 1957 Fr. 8.—, Usland Fr. 9.50

(im Buechhandel Fr. 10.—)

Einzelprys Fr. 1.50, Nr. 3, Postcheck II a 795 Fryburg

Adrässe für Briefe, Ms., Bstellige, Büecher: Dr. phil. G. Schmid, Fryburg i./Ue.

Rückporto nid vergässe!

---

Fryburg, im Brachmonet 1957

19. Jahrgang Nr. 3

---

## Senta Simon Bärndütschi Sonett

We men eim öppis Apartigs zum Ässen uftischet oder ganz e fyne Tropfe zum Trinken ufstellt, so seit men öppe: «Ja, das muess me mit Verstand chüstige, das muess me mit Andacht trinke!» — So geit es üs au bim Läsén und Chüstige vo de Sonett vo der Senta Simon. Sid meh als zwöi Jahr schaffet sie dranne, sinnt, fielet, änderet hien es Wort, glettet dert e Värs, baut die Strophen um, sucht bim nen anderen non e schöneren und bessere Schluss, bis sie findet, es söttis de öppe tue und mi dörfi die Uswahl vo ihrne neuje Värse i d Wält la use flüge, ehnder i ds Härz und i d Seel vo däne Lüt, wo no Zyt und Geist gnueg hei, für Gedicht zläse. D Arbeit isch wäge dessi no gäng nid fertig. Bi däm und jenem Värs und Rhythmus chönnt me no der Finger druf legen und säge: «Villicht hätti hie no öppis anders passt, oder dert wäri mir es anders Wort, es anders Bild, en andere Schluß lieber!» — Und dermit hätti dä Läser grad rächt, wäge vollkommeni Sonett oder «Klinggedicht» git es dänk chuum uf dären Ärde. Au bi de grössten und berüemtete Sonettdichter, wie bim Petrarca, Camoens, Shakespeare und i der dütsche Literatur bim Bürger, Rückert, Platen, Rilke u. a., cha me, we me grad wott, gäng wider es Häkli, e Fähler oder öppis «Verkünstelts» i der einten oder i der andere Zile vüregrüble, we me nid gar wott am Ufbou, a der Einheit vo der Idee, am Schluss, wo villicht e Gump macht, afa umedoktere . . .

Ds Sonett isch äben e schwäri Värseform, und si nimmt e Dichter in e

strängi Schuel. E jede Lyriker sötti sech, zu syr eigene Freud und zu sym eigene Vorteil, drannen üebe. Er cha derbi nume lehre und gwinne. Das gilt au für alli, wo wei schwyzerdütschi Gedicht schribe; üsi Sprach laht sech nid so ring formen und meistere; es isch mängisch es zäjs Müejen und Müede. Aber wär derbi der Muet nid verliert und wär di nötigi Chraft und Begabung het, gwünnt derbi e schönen und edle Lohn. Sy dichterischi Arbeit wird gsägned; sy Sprach, sy Poesy wird rycher und ryfer, Wort und Sinn finde sech liechter zäme, Bild, Rhythmus, Värs und Rym wärde zum ne Guss.

Nach 1800 het es i Dütschland bi de Dichter fasch en Art «Sonettwuet» gä; au der Goethe het sech denn mit de Romantiker zum Sonettdichter bekehrt. E so hei's au vili Dichter früecher scho im 16. und 17. Jahrhundert gha. Vore settige «Wuet» han i im Schwyzerdütsche no nüd gmerkt. Hingäge hei scho verschideni Dichter sech mit styfem Erfolg a die Form wagt, so z. B. der Meinrad Lienert («Us Härz und Heimed»), der Traugott Meyer (im «Mueterguet»), d Emma Rogivue-Waser u. a.

Sovil mir wüsse, isch d Senta Simon di ersti, won e ganze Zyklus Sonett usegit. D Bärner si also nid gäng di letschte, gwüss nid, we men au no a «Homer, bärndütsch» vom A. Meyer dänkt. Zyklus bedüet aber Uswahl, Ufbou, Zämehang, e schöne Boge vom Afang zum Änd, der Wäg zum ne Zil. Und dä inner Klang, die helli Stäge, das warme Lüchten und Füüren entdecke mir i däne Sonett uf oberaargauerdütsch i schöner und glücklicher Art und Wys. Vom «Früeligsräge» und «Aprille» geit der Wäg süferli wifers zum «Seifeplöterli», zum «Luft und i», gäng sittig und ärstig vo usse nach inne, bis mer zu de Frage chöme, wo heisse: «Was stuunsch?», «Liebi», «Es Wunger». Glück und Freud muess me sech aber fasch gäng verdiene mit em Plangen und «Warte», und we's im Läbe a ds Trenne geit, blibt is mängisch nume no «Ds Bild», wo wifers wirkt und lüchtet i «Mys Härz», bis me still wird bim «Zfride si». D Gedanke a «Tod» füeren is de vom irdische Wünschen und Sorgen ewägg; mir wei üs für gäng dräije zum «Liecht» und üses Läben und Stärbe richte «Zu Gott».

Au i däm eigenartigen und fyne Zyklus tuet der Mönsch wachsen und ryfe, geit d Stäge Tritt für Tritt ufe, bis sy Wäg imündet i ewig Wäg. Er, der Mönsch, chunt vo Gott, wo im Früelig ds Land, d Bächli, Chrütli und Blueme, Tier und Lüt neu erweckt; — er läbt, schaffet, strydet, freut und lidet sech und geit gängs wifers vo Stund zu Stund, vo Tag zu Tag, vo Jahr zu Jahr, bis er Trost und Ruch findet im Unändlichen und Vollkommene, bis er wider achlopfet ännafür a der Himmelstür. Und so wird der Afang wider zum Änd, und üse Läbeswäg füert is vom Herr und Meister — dür di irdische Freuden und Lide — glüeteret wider hei, zum liebe Gott.

G. S.